





『永樂北藏』整理委員會

永樂北藏

綫裝書局



菩提資糧論卷第一

仁六

聖者龍樹本 比丘自在釋

隋天竺三藏達摩笈多譯

今於諸佛所 合掌而頂敬 我當如教說
佛菩提資糧

佛者於一切所應知中得覺此為佛義如所
應知而知故又於無智睡眠中覺故覺者寤
為義以離無智睡故又諸釋梵等不覺此覺
唯是名聲普遍三界者所能覺故一切諸佛
乃覺此覺以一切種遍智唯佛所知非諸聲

聞獨覺菩薩以不共法具足故諸者無闕故
謂過去未來現在等頂者上分故合掌者攝
手故敬者向禮故我說者自分別故如教者
彼彼經中種種已說今亦如彼教說故佛者
離無智故菩提者一切智智故資糧者能滿
菩提法故譬如世間瓶盈釜盈等盈是滿義
如是以滿菩提法為菩提資糧又以持為義
譬如世間共行日攝於熱月攝於冷攝是持
義如是以持菩提法為菩提資糧言資糧者
即是持義又以長養為義譬如世間有能滿

千或百或十或唯自滿或難自滿菩提資糧亦復如是以長養菩提爲義又以因爲義如舍城車等因中說言舍資糧城資糧車資糧如是於生菩提因緣法中說名菩提資糧又以衆分具足爲義譬如祭祀分中杓火等具足名爲祭祀非不具足亦如身分頭手足等具足得名爲身非不具足施分亦如是施者施物受者迴向此等具足名施資糧非不具足戒等資糧亦如是是故衆分具足義是資糧義如是我說菩提資糧是能滿者持者長

養者菩提因者菩提分具足者皆其義也何能說無闕 菩提諸資糧 唯獨有諸佛別得無邊覺

何能者何力也若聲聞若菩薩少分覺知無力能故若欲說諸菩提資糧無闕無餘唯是諸佛別得無邊覺者言無邊覺謂非少分覺故以佛世尊於無邊應知義中覺知無礙是故佛名無邊覺者又於欲樂及自疲苦斷常有無等邊見中覺而不著以所覺無邊見故佛名無邊覺者

問何故資糧唯佛能說餘人不能答

佛體無邊德 覺資糧為根 是故覺資糧

亦無有邊際

佛體者即佛身也以彼佛體具足無邊功德故說佛體無邊德功德者謂可稱讚義若可稱讚則名功德又是數數作義譬如數數誦習經書彼則說名作功德者又是牢固義譬如作繩或合二為功或合三為功又是增長義譬如息利或增二為功或增三為功又是依止義譬如諸物各以依止為功如是佛體

為戒定等無邊差別功德依止故說佛體有

無邊功德覺資糧為根者彼菩提資糧與佛

體無邊功德為根本故根者建立義菩提者

智也根即資糧以彼資糧能建立一切智智

是故資糧為佛體根本良由佛體有無邊功

德須以無邊功德成彼佛體是故資糧亦無

邊際

當說彼少分 敬禮佛菩薩 是諸菩薩等

次佛應供養

彼諸資糧無邊而智有邊是以說彼資糧不

無能闕故言當說彼少分敬禮佛菩薩問應
禮佛以一切衆生中最勝故何義此中亦禮
菩薩答是諸菩薩等次佛應供養故諸菩薩
等從初發心乃至覺場皆應供養菩薩有七
種一初發心二正修行三得無生忍四灌頂
五一生所繫六最後生七詣覺場此等菩薩
於諸佛後次應供養以身口意及外物等而
供養之初發心者未得地正修行者乃至七
地得無生忍者住第八地灌頂者住第十地
一生所繫者方入兜率陀最後生者兜率陀

處往詣覺場者欲受用一切智智於七種菩
薩中初發心菩薩一切衆生皆應禮敬何況
餘者何以故深心寬大故如來教量故初發
心菩薩發菩提心時於十方分無減諸佛土
無減諸衆生無減以慈遍滿發菩提心若未
度衆生我當度之未解脫者我當解脫未蘇
息者我當蘇息未寂滅者我當寂滅應聲聞
者我當令入聲聞乘中應獨覺者我當令入
獨覺乘中應大乘者我當令入大乘之中欲
令衆生悉得寂滅非爲寂減少分衆生以是

深心寬大故一切衆生皆應禮敬何者爲如
來教量如世尊說迦葉譬如新月便應作禮
非爲滿月如是迦葉若信我者應當禮敬諸
菩薩等非爲如來何以故從於菩薩出如來
故又聲聞乘中亦說

仁六

於彼知法者 若老若年少 應供養恭敬
如梵志事火

以是故諸菩薩等次於佛後皆應供養如偈
說

紹持佛種者 勝餘少分行 是故諸菩薩

次佛後供養	慈與虛空等	普遍諸衆生
是故最勝子	次佛後供養	於諸衆生類
大悲猶如子	是故此佛子	次佛後供養
悲心利衆生	無二似虛空	是故無畏者
次佛後供養	一切時如父	增長諸衆生
是故諸菩薩	次佛後供養	猶如地水火
衆生常受用	是故施樂者	次佛後供養
唯爲利衆生	捨離自樂因	是故彼一切
次佛後供養	佛及佛之餘	皆從初心出
是故諸菩薩	次佛後供養	

問尊者已正說資糧教緣起今應說資糧體
答

既爲菩薩母 亦爲諸佛母 般若波羅蜜
是覺初資糧

以般若波羅蜜是諸菩薩母故爲菩提初資

糧何以故以最勝故如諸身根中眼根最勝

諸身分中頭爲最勝諸波羅蜜中般若波羅

蜜最勝亦如是以般若波羅蜜最勝故爲初

資糧又前行故如諸法中信爲前行諸波羅

蜜中般若波羅蜜前行亦如是以彼陀那若

不迴向菩提則非陀那波羅蜜如是尸羅等
不迴向菩提亦非尸羅等波羅蜜迴向菩提
即是般若由般若前行故能迴向以是前行
故諸波羅蜜中般若波羅蜜爲菩提初資糧
又是諸波羅蜜三輪淨因體故以般若波羅
蜜爲諸波羅蜜三輪淨因體是故般若波羅
蜜爲菩提初資糧三輪淨者菩薩於般若波
羅蜜中行布施時不念自身以離取自身故
不念受者差別以斷一切處分別故不念施
果以諸法不來不出相故如是菩薩得三輪

淨施如淨施淨戒等亦如是以此般若波羅蜜是彼諸波羅蜜三輪淨因體故般若波羅蜜為菩提初資糧又大果故般若波羅蜜大果勝諸波羅蜜如經說

菩提心福德 及以攝受法 於空若信解

價勝十六分

鞞羅摩經中大果因緣此中應說以是大果

故般若波羅蜜為菩提初資糧

問何故般若波羅蜜得為菩薩母答以能生

故方便所攝般若生諸菩薩令求無上菩提

不求聲聞獨覺以是生佛體因故般若波羅

蜜為菩薩母又置於五波羅蜜中故如言冥

鉢囉膩波低也冥為性鉢囉膩波低為誦即

此性相是為摩多摩多翻為母於字聲論中

語中出冥是摩多體性鉢囉膩波低是誦摩

多義鉢囉膩波低正翻為置故以置為母義

譬如母生子時或置牀敷或置地上般若波

羅蜜亦如是生彼求菩提菩薩時置於施等

五波羅蜜中以能置求菩提菩薩故說般若

波羅蜜為菩薩母又以量故如言茫摩泥也

茫為性摩泥為誦即此性相是為摩多於字聲論

中摩多字又從茫摩泥語中出茫亦是體性
摩泥是誦其義摩泥正翻為量故以量為母
義譬如母生子已隨時籌量如是我子以此
食故身增以此故損減菩薩亦如是以般若
波羅蜜自量其身我應如是布施我應如是
持戒等以是自量因緣故說般若波羅蜜為
菩薩母又以斟量故譬如量物有鉢邏薩他
有阿宅迦有突噓拏有佉梨底等如此問合
升斗斛之
類斟量諸菩薩亦如是此初發心此修行此
得忍等以斟量因緣故說般若波羅蜜為菩
薩母又以脩多羅中誦故所謂於諸經中作

母名誦彼等經中有名稱遍諸佛國菩薩名
毗摩羅吉利帝說伽他言舊云維摩
詰者不正
般若波羅蜜 菩薩仁者母 善方便為父
慈悲以為女
復有餘經亦如是誦以脩多羅量故說般若
波羅蜜為菩薩母仁六
七
問何故般若波羅蜜亦為諸佛母
答以出生及顯示無障礙智故過去未來現
在諸佛由般若波羅蜜阿舍故煩惱已盡當
盡今盡以是出生故般若波羅蜜為諸佛母

顯示無障礙智者以過去未來現在諸佛世尊顯示無障礙智皆般若波羅蜜中顯以是顯示無障礙智故諸佛亦以般若波羅蜜爲母此中有輸盧迦

由大悲相應 般若波羅蜜 於無爲際岸

佛子能超過 得到無等覺 利攝諸衆生

智度爲母故 大人能如是 由得智度故

乃得成佛體 故爲諸佛母 勝仙之所說

何故此名般若波羅蜜以不與聲聞獨覺共故名般若波羅蜜於上更無所應知故名般若

若波羅蜜此智到一切彼岸故名般若波羅蜜此般若波羅蜜餘無能勝故名般若波羅蜜三世平等故名般若波羅蜜虛空無邊平等故名般若波羅蜜如是等勝因緣如般若波羅蜜經中說故名般若波羅蜜

問已略說菩提初資糧第二資糧今應說

施戒忍進定 及此五之餘 皆由智度故

波羅蜜所攝

此中陀那波羅蜜爲第二菩提資糧以般若前行故菩薩爲菩提而行布施是故施爲第

二資糧於中生他身意樂因名布施非爲作
苦彼有二種謂財施法施財施亦有二種謂
共識不共識共識亦有二種謂內及外若施
自身支節若全身施是爲內施若施男女妻
妾及二足四足等是爲外施不共識亦有二
種謂可食不可食此有六種若施身內受用
飲食等物是爲可食若施身外受用香鬘所
攝金銀珍寶衣服土田財物園池遊戲處等
是爲不可食然可受用法施亦有二種謂世
間出世間若因法施於流轉中舊云生死者非正翻名今

改爲流轉也此後諸出生可愛身根境界是云流轉者皆是此義
爲世間若因法施果報越度流轉是爲出世
間彼財施法施各有二種謂有著無著若爲
自身若爲資生若爲勝果希望相續以財法
施是爲有著若爲利益安樂一切衆生若爲
無障礙智是爲無著其餘更有無畏施等亦
隨順入財施中彼二種施果及餘氣謂津液也
如大乘經說此中當略說偈
飲食及被服 隨須皆布施 亦施花鬘燈
末香與音樂 或施諸美味 藥物及椅枕

養病之所須	并醫人給侍	男女與妻妾
奴婢及倉庫	莊飾諸姝女	隨須皆布施
所有諸寶物	種種莊嚴具	象馬車乘等
妙物盡施之	園林修道處	池井集會堂
土田并雜物	客舍等皆施	若二足四足
若復一洲渚	村落與國都	及王境悉施
施所玩好物	利樂憐須者	為諸衆生依
怖者施無畏	施其所難捨	手足眼耳鼻
亦施心與頭	舉身悉能捨	修行布施時
常於受者所	應生福田想	亦如善眷屬

布施諸果報	具足善聚集	迴向為自他
成佛及淨土	菩薩所行施	正迴向佛體
此菩薩陀那	得名波羅蜜	若彼若此岸
亦無能說者	施果到於彼	說為施彼岸
今說施主差別		
不貪於愛果	悲故三輪淨	正覺說彼施
是為求菩提	我已作此事	正作當亦作
若作如是捨	傭賃非布施	貪增施果故
隨須即能捨	說為息利人	智念非施主
不貪增益果	唯以悲心施	此名真施主

餘皆是商販	如大雲遍雨	諸處等心施
此名大施主	餘皆是少分	施及施果報
哀愍與須者	施主於衆人	猶如其父母
不念所施物	受者及施者	而常樂布施
此名為施主	若不分別佛	菩提與菩薩
而為菩提施	彼當速成佛	
問已解釋陀那波羅蜜今應說尸羅波羅蜜		
答波羅蜜義如前解釋尸羅義今當說以尸		
羅故說為尸羅言尸羅者謂習近也此是體		
相又本性義如世間有樂戒苦戒等又清涼		

義為不悔因離心熱憂惱故又安隱義能為
他世樂因故又安靜義能建立止觀故又寂
滅義得涅槃樂因故又端嚴義以能莊飾故
又淨潔義能洗惡戒垢故又頭首義能為入
衆無怯弱因故又讚歎義能生名稱故此戒
是身口意善行所轉生於中遠離殺生不與
取欲邪行等是三種身戒遠離妄語破壞語
麤惡語雜戲語等是四種口戒遠離貪瞋邪
見等是三種意戒如是等身口意善行所轉
生十種戒與貪瞋癡所生十種惡行為對治

彼十種惡行下中上常習近故墮於地獄畜
生閻摩世等如前數十種善行戒若不與覺
分相應下中上常習近故隨福上上差別當
得天人差別若與覺分相應十種善行戒上
上常習近多作故當得聲聞地及菩薩地中
轉勝差別又此菩薩戒聚有六十五種無盡
如無盡意經中說當知又略說有二種戒謂
平等種時戒不平等種時戒平等種時戒者
以此善身口意積聚故於生生中種時若界
若富樂若聲聞獨覺若相報若淨土若成熟

衆生若正遍覺等彼皆說名平等種時戒與
此相違名不平等種時戒復有二種戒謂有
作戒無作戒若於有作中有所作者名有作
戒與此相違名無作戒復有九種戒謂凡夫
戒外道五通戒人戒欲界天子戒色界天子
戒無色界天子戒十六謂學無學聲聞戒獨覺戒
菩薩戒凡夫戒者入生處故盡外道五通戒
者神通退故盡人戒者十善業道盡故盡欲
界天子戒者福盡故盡色界天子戒者禪那
盡故盡無色界天子戒者三摩鉢帝盡故盡

諸學無學聲聞戒者究竟涅槃故盡獨覺戒者闕大悲故盡菩薩戒者則無有盡以此戒能顯明諸戒故種子相續無盡故菩薩相續無盡故如來戒無盡故以此因緣菩薩戒者說名無盡諸菩薩戒迴向菩提故說名戒波

羅蜜此中有輸盧迦偈

猶如父愛功子 亦如自身愛壽命
出離有愛戒亦爾 大心健者之所愛
此戒牟尼習近已 解脫於欲離有愛
似鳥凡人所棄捨 智者常當愛此戒

此戒利益於自他	令身端嚴離憂乏
此世他世勝莊嚴	是戒智者當所愛
此戒不由於他力	非不可得非乞求
皆因自力而得之	是故上人愛此戒
財物國境并土地	自身肌肉及以頭
皆能捨之不捨戒	爲欲淨彼勝菩提
假使從天墜於地	設令自地昇於天
爲滿離垢無染地	應當決定不移動
若已滿足戒方便	此時即得第三地
既得離垢清淨地	是時成就心所欲